

بِسْمِ اللَّهِ الرَّحْمَنِ الرَّحِيمِ
نَحْمَدُهُ وَنُصَلِّي عَلَى رَسُولِهِ الْكَرِيمِ

সংক্ষিপ্তসার খুতবা জুমাতা

রমযানের কল্যাণরাজি
এবং হযরত মসীহ মাওউদ (আ.) এর নির্দেশাবলীর আলোকে তাকওয়া
অর্জনের জ্ঞানগর্ভ বর্ণনা

সৈয়দনা হযরত আমীরুল মুমিনীন হযরত মির্যা মাসরুর আহমদ খলিফাতুল মসীহ আল্
খামেস আইয়াদাুল্লাহ তাআলা বেনাসরিহিল আযিয কর্তৃক ১৫ মার্চ, ২০২৪ ইং তারিখে
যুক্তরাজ্যের (টিলফোর্ড) ইসলামাবাদের মসজিদে মুবারকে প্রদত্ত খুতবা জুমআর সংক্ষিপ্তসার

আশ্হাদু আল্লাহ ইলাহা ইল্লাল্লাহু ওয়াহদাহু লাশারীকালাহু, ওয়াশ্হাদু আন্না মুহাম্মাদান আবদুহু ওয়ারসূলুহু।
আম্বাবাদু ফা-আউযুবিল্লাহি মিনাশ শয়তানির রজিম, বিসমিল্লাহির রহমানির রহিম। আল্হামদু লিল্লাহি রব্বিল
‘আলামিন। আর রহমানির রহিম। মালিকি ইয়াওমিদ্দিন। ইয়্যাকা না’বুদু ওয়া ইয়্যাকা নাসতাজ্জ’ন। ইহদিনাস
সিরাত্বাল মুসতাক্বীম। সিরাত্বাল লায়ীনা আনআ’মতা আ’লাইহিম। গায়রিল মাগদূবি ‘আলায়হিম। ওয়ালাদদল্লীন।

তাশাহুদ, তা’উয ও সূরা ফাতিহা পাঠের পর সৈয়দনা হুযুর আনোয়ার (আই.) সূরা বাকারার নিম্নোক্ত
আয়াত পাঠ করেন :

يَا أَيُّهَا الَّذِينَ آمَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِنْ قَبْلِكُمْ لَعَلَّكُمْ تَتَّقُونَ
أَيَّامًا مَعْدُودَاتٍ فَمَنْ كَانَ مِنْكُمْ مَرِيضًا أَوْ عَلَى سَفَرٍ فَعِدَّةٌ مِنْ أَيَّامٍ أُخَرَ وَعَلَى الَّذِينَ يُطِيقُونَهُ
فِدْيَةٌ طَعَامُ مَسْكِينٍ فَمَنْ تَطَوَّعَ خَيْرًا فَهُوَ خَيْرٌ لَهُ وَأَنْ تَصُومُوا خَيْرٌ لَكُمْ إِنْ كُنْتُمْ تَعْلَمُونَ

অর্থ: হে যারা ঈমান এনেছ! তোমাদের জন্য (সেভাবে) রোযা বিধিবদ্ধ করা হলো যেভাবে তোমাদের
পূর্ববর্তীদের জন্য বিধিবদ্ধ করা হয়েছিল, যেন তোমরা তাকওয়া অবলম্বন করতে পারো। (তোমরা রোযা
রাখবে) হাতেগোনা কয়েকটি দিন মাত্র। তবে তোমাদের মাঝে যে অসুস্থ অথবা সফরে থাকে সেক্ষেত্রে
(তাকে) অন্যান্য দিনে গণনা পূর্ণ করতে হবে। আর যারা এর (অর্থাৎ রোযা রাখার) সামর্থ্য রাখে না তাদের
‘ফিদিয়া’ (হলো) একজন দরিদ্রকে খাওয়ানো। অতএব, যে স্বতঃস্ফূর্তভাবে পুণ্যকর্ম করে তা অবশ্যই তার
জন্য উত্তম। আর তোমরা যদি জানতে (তাহলে বুঝতে) রোযা রাখাই তোমাদের জন্য শ্রেয়। (সূরা আল
বাকার: ১৮৪-১৮৫)

আল্লাহ তা’লার কৃপায় রমযান মাস শুরু হয়েছে। মহানবী (সা.) বলেন, এটি অত্যন্ত বরকতময় একটি
মাস যখন আল্লাহ তা’লা তাঁর বান্দার প্রতি সাধারণ দিনগুলোর তুলনায় অনেক বেশি কৃপা করেন, যা আমরা
কল্পনাও করতে পারি না। এ মাসে খোদা তা’লার পক্ষ থেকে শয়তানকে শৃঙ্খলাবদ্ধ করাও আমাদের জন্য
অনেক বড় অনুগ্রহ। অতএব, যখনই আল্লাহ তা’লার প্রতি আমরা ঝুঁকি তখনই তাঁর কৃপার দ্বার পূর্বের চেয়ে

অধিক হারে আমাদের জন্য উন্মোচিত হয়। বিগত দিনগুলোতে যারা আল্লাহ তা'লার ইবাদতের বিষয়ে আলস্য প্রদর্শন করেছে, পবিত্র কুরআন পাঠ, অনুধাবন এবং এর শিক্ষার ওপর আমলের ক্ষেত্রে দুর্বলতা প্রদর্শন করেছে তাদের জন্য আল্লাহ তা'লা এ মাসে ফরয এবং নফল ইবাদতগুলোও বিশেষভাবে পালনের সুযোগ করে দিয়েছেন। তাই এই সুযোগকে কাজে লাগানোর এবং এথেকে উপকৃত হওয়ার সর্বাঙ্গিক চেষ্টা করুন। রমযান উপলক্ষ্যে মসজিদে দরস হয়ে থাকে, এমটিএ'তেও দরস সম্প্রচারিত হয়- এগুলো থেকে লাভবান হওয়া উচিত এবং আল্লাহ তা'লার নৈকট্য লাভের চেষ্টা করা উচিত এবং এ পরিবেশকে জীবনের স্থায়ী অভ্যাসে পরিণত করা উচিত যেন আমরা আল্লাহ তা'লার কৃপা এবং অনুগ্রহরাজির স্থায়ী উত্তরাধিকারী হতে পারি। মহানবী (সা.) বলেন, “মা তার হারানো সন্তানকে খুঁজে পেলে যেকোনো আনন্দিত হয় আল্লাহ তা'লা তাঁর পথহারা বান্দাকে ফিরে পেলে তার চেয়েও বেশি আনন্দিত হন।”

আল্লাহ তা'লা আমাদেরকে এ আয়াতে প্রথমেই বিনয়ানত পছা অবলম্বনের নির্দেশ দিয়েছেন আর তা হলো, রোযা এমন ইবাদত নয় যা তোমরাই প্রথমে পালন করছ, বরং পূর্বেও বিভিন্ন জাতিতে রোযার প্রচলন ছিল। তবে, একথা ঠিক যে, তাদের রোযার পদ্ধতি ভিন্ন ছিল কিন্তু তাদের জন্যও রোযা বিধিবদ্ধ করা হয়েছিল এবং তাদেরকেও তাকওয়ার ওপর প্রতিষ্ঠিত হওয়ার তাগিদ দেয়া হয়েছিল।

তোমরা যদি তাকওয়ার ওপর প্রতিষ্ঠিত থাকো তাহলে শুধুমাত্র নিজেকেই রক্ষা করবে না, বরং শয়তান বা শয়তানী চিন্তাধাকেও পরাস্ত করবে। এটিই সেই পদ্ধতি যার ওপর পরিচালিত হলে রোযার প্রাপ্য হক্ক আদায় হতে পারে, নতুবা মহানবী (সা.) বলেছেন; তোমাদের অভুক্ত থাকায় আল্লাহ তা'লার কোনো আগ্রহ নেই। রোযার প্রকৃত উদ্দেশ্য হলো, তাকওয়া (অর্থাৎ খোদাভীতি) সৃষ্টি করা। যদি এমনটি না করা হয় তাহলে রোযার উদ্দেশ্য ব্যর্থ। বর্তমান যুগে অধিকাংশ মুসলমান স্বাচ্ছন্দ্যে সেহেরী ও ইফতারী করে থাকে। আবার দরিদ্রদের সেহেরী ও ইফতারীর ব্যবস্থা করতে অনেক কষ্ট হয়; তাদেরও অভুক্ত থাকা আল্লাহ তা'লার নিকট তখনই গৃহীত হবে যখন তারা তাকওয়ার পথে বিচরণ করবে, নিজেদের ইবাদতকে সুসজ্জিত করতে চেষ্টা করবে।

ধনীদের উচিত বিশেষভাবে রমযানে দরিদ্রদের খোঁজখবর রাখা। রমযানে পবিত্র কুরআন নিজে পাঠ করা ও অন্যকে পড়ানো, নিজে কুরআন শোনা ও অন্যকে শোনানোর প্রতি অধিক মনোযোগ দেয়া উচিত। কিন্তু বাস্তবতা হলো, অনেকে সারাদিন কাজ শেষ করে ইফতারির দাওয়াত খাওয়াতে ব্যস্ত হয়ে পড়ে; অন্যদিকে যারা ইফতারির আয়োজন করে তারা কেবলমাত্র এ চিন্তাই করতে থাকে যে, কীভাবে ভালো খাবারের ব্যবস্থা করা যায় আর কীভাবে মানুষের বাহবা পাওয়া যায়। বস্তুত, এসব কর্মকাণ্ড রমযানের প্রকৃত উদ্দেশ্য নয়, বরং এগুলো মানুষকে তাকওয়া থেকে দূরে ঠেলে দেয়। বর্তমানে ইফতার পার্টির নামে যা করা হয় এগুলো বেহুদা কাজ। এগুলোর সাথে রোযার কোনো সম্পর্ক নেই, আমার এসব একবারেই পছন্দ নয়। হযরত মসীহ মওউদ (আ.) রোযার তাৎপর্য বর্ণনা করতে গিয়ে বলেন,

“রোযার প্রকৃত তাৎপর্য সম্পর্কে মানুষ অনবহিত। প্রকৃত বিষয় হলো, যে দেশে মানুষ যায় নি বা যে জগৎ সম্পর্কে মানুষ জানে না সে সেখানকার পরিস্থিতি সম্পর্কে কী বর্ণনা করবে? রোযা কেবল এটি নয় যে, এতে মানুষ ক্ষুধার্তও পিপাসার্ত থাকবে, বরং এর একটি প্রভাব আছে যা অভিজ্ঞতার আলোকে উপলব্ধি করা যায়। মানুষের প্রকৃতিগত বৈশিষ্ট্য হলো, সে যত কম খায় তত বেশি আত্মার পরিশুদ্ধি হয় এবং দিব্যদর্শনের শক্তি বৃদ্ধি পায় (কিন্তু দুর্ভাগ্যজনক হলো, বর্তমানে রোযা মানেই হলো পানাহার)। রোযার মাধ্যমে খোদা তা'লার অভিপ্রায় হলো, এক প্রকার আহার কমিয়ে আরেক প্রকার খাদ্য বৃদ্ধি করা। রোযাদারের সর্বদা এটি দৃষ্টিপটে রাখা উচিত যে, এর মাধ্যমে শুধু অভুক্ত থাকাই উদ্দেশ্য নয়। বরং তার খোদা তা'লার স্মরণে মগ্ন

থাকা উচিত যেন খোদা তা'লার প্রতি মনোযোগ নিবদ্ধ হয় আর পার্থিবতার প্রতি বিমুখতা সৃষ্টি হয়।”

অতএব রমযানে পবিত্র কুরআন পাঠ এবং তা অনুধাবনের পাশাপাশি ইবাদত ও যিকরে ইলাহীর প্রয়োজনীয়তা অত্যধিক। এর জন্য হযরত মসীহ মাওউদ (আ.)-এর ইলহামী দোয়া, “সুবহানাল্লাহি ওয়া বিহামদিহি সুবহানাল্লাহিল আযীম, আল্লাহুমা সাল্লি আলা মুহাম্মাদিওঁ ওয়া আলি মুহাম্মদ” অনেক গুরুত্বপূর্ণ। একইসাথে দোয়া গৃহীত হওয়ার জন্য মহানবী (সা.)-এর দোহাই দেয়াও অতি আবশ্যিক; এটি আল্লাহ তা'লার নির্দেশ।

আয়াতের দ্বিতীয়াংশের ব্যাখ্যা হল, এখানে আল্লাহ তা'লা কতিপয় মৌলিক নির্দেশ প্রদান করেছেন। তিনি বলেছেন, মুসাফির বা অসুস্থ ব্যক্তি এ সময় রোযা রাখবে না আর কেউ যেন নিজের ওপর বোঝা না চাপায়, বরং তা পরবর্তীতে পূর্ণ করে। এখানে আল্লাহ তা'লা অপারগদের জন্য স্বাচ্ছন্দ্যের বিধান রেখেছেন। ধর্মবিরোধীরা ইসলামের অনুসারীদের মাঝে বিশৃঙ্খলা সৃষ্টির উদ্দেশ্যে বলে যে, তোমরা ধর্মীয় নির্দেশের শৃঙ্খলে আবদ্ধ। এ আয়াতে এর উত্তর এভাবে দেয়া হয়েছে যে, আল্লাহ তা'লার কোনো আদেশ আমাদের জন্য কষ্টকর নয়, সবকিছুর সাথেই অবকাশও রয়েছে। রোযা ফরয, কিন্তু মানুষের প্রকৃতিগত অপারগতার প্রতি দৃষ্টি রাখা হয়েছে আর বলা হয়েছে, বছরের অন্য যে কোনো সময় ভাঙা রোযা পূর্ণ করো; এরপর সামর্থ্য থাকলে ফিদিয়া প্রদান করো। ফিদিয়াও আল্লাহ তা'লার পক্ষ থেকে পুণ্যের আরেকটি সুযোগ, কেননা এদ্বারা দরিদ্রদের সাহায্য করা হয়ে থাকে। অর্থাৎ, বান্দার প্রাপ্য অধিকার প্রদানের নির্দেশ দেয়া হয়েছে। এরপরও কেউ যদি এটি অনুধাবন না করে তাহলে এটি তার দুর্ভাগ্য।

ফিদিয়ার উদ্দেশ্য কি তা বর্ণনা করে হযরত মসীহ মাওউদ (আ.) বলেন,

“একবার আমার হৃদয়ে প্রশ্নে জাগে, ফিদিয়া নির্ধারণের কারণ কি? তখন জানতে পারলাম, এটি সামর্থ্য লাভের উদ্দেশ্যে। অর্থাৎ, এর মাধ্যমে যেন রোযা রাখার সামর্থ্য অর্জিত হয়। খোদা তা'লার পবিত্র সত্তাই শক্তি যুগিয়ে থাকে, তাই সবকিছু তাঁর কাছেই চাওয়া উচিত। খোদা তা'লা সর্বশক্তির আধার। তিনি চাইলে একজন যক্ষ্মা-রোগীকেও রোযা রাখার সামর্থ্য দিতে পারেন। ফিদিয়ার উদ্দেশ্যই হলো, সেই শক্তি লাভ করা আর এটি খোদার কৃপায়-ই লাভ হয়। অতএব, আমার মতে এভাবে দোয়া করলে খুব ভালো হয়, ‘হে আমার প্রভু-প্রতিপালক! এটি তোমার আশিসপূর্ণ একটি মাস, অথচ আমি এ থেকে বঞ্চিত। জানি না, আগামী বছর বাঁচব কি না কিংবা বাদ পড়া রোযাগুলো রাখতে পারব কি না? তাঁর কাছে যদি এভাবে শক্তি চায় তাহলে আমার দৃঢ় বিশ্বাস, এমন হৃদয়ের অধিকারীকে খোদা তা'লা শক্তি দান করবেন।”

অনুরূপভাবে অসুস্থ ও মুসাফিরদের সম্পর্কে তিনি (আ.) বলেন,

“পবিত্র কুরআনে উল্লিখিত অবকাশগুলোর ওপর আমল করাও এক প্রকার তাকওয়া। আল্লাহ তা'লা মুসাফির এবং রোগীদেরকে অন্য সময়ে রোযা রাখার অনুমতি এবং সুযোগ দিয়েছেন। তাই এ নির্দেশও পালন করা উচিত। আমি পড়েছি, অনেক বুযুর্গরা এ মত দিয়েছেন যে, যদি কেউ মুসাফির অথবা অসুস্থাবস্থায় রোযা রাখে তাহলে এটি পাপ। কেননা প্রকৃত উদ্দেশ্য হলো, আল্লাহ তা'লার সন্তুষ্টি অর্জন করা, নিজের ইচ্ছা পূরণ নয় আর আল্লাহ তা'লার সন্তুষ্টি তাঁর অনুগত্যের মাঝেই নিহিত, তিনি যে আদেশ দেন তা পালন করা হোক এবং নিজের পক্ষ থেকে এর ব্যাখ্যা না করা হোক; যেমনটি বর্তমান যুগের আলেমরা নিজেদের জ্ঞানের ধারণানুসারে করে থাকে।”

রোযার মূল উদ্দেশ্যই হলো, লাআল্লাকুম তাভাকুন- অর্থাৎ, যেন তোমরা তাকওয়া অবলম্বন করতে পারো। তাকওয়ার কোনো একটি শাখা অবলম্বন করলে চলবে না। যেভাবে এক বিন্দু পানি আমাদের পিপাসা

নিবারণ করতে পারে না আর খাবারের একটি দানা আমাদের পেট ভরতে পারে না ঠিক একইভাবে একটি তাকওয়ার শাখা অবলম্বন করে কেউ তাকওয়াশীল বা খোদাতীক হতে পারে না। সম্পূর্ণরূপে খোদাতীতি, খোদাভক্তি ও খোদাপ্রেম হৃদয়ে থাকলেই সত্যিকার তাকওয়াশীল হওয়া সম্ভব। আল্লাহ তা'লা আমাদের সবাইকে তাঁর সন্তষ্টির পথে পরিচালিত হয়ে তাকওয়ার মাধ্যমে জীবনযাপনের তৌফিক দিন আর আল্লাহ করুন আমরা যেন ইসলামের অনিন্দ্য সুন্দর শিক্ষামালার ওপর আমলকারী হই এবং এ রমযানে আল্লাহ তা'লার অগণিত কল্যাণ লাভে ধন্য হই। অতএব, সৌভাগ্যবান সে যে আল্লাহ তা'লার সাথে সম্পর্ক সৃষ্টি করার মাধ্যমে রোযার কল্যাণরাজি থেকে উপকৃত হয়।

পরিশেষে হুযুর (আই.) বিভিন্ন শ্রেণির মানুষের জন্য দোয়ার আহ্বান করে বলেন, সমগ্র পৃথিবীর সকল আহমদী সদস্য-সদস্যা এবং জামাতের উন্নতি ও কারাবন্দি আহমদীদের মুক্তির জন্য দোয়া করুন। সামগ্রিকভাবে মুসলিম বিশ্বের জন্যও দোয়া করুন- আল্লাহ তা'লা তাদেরকে বিবেক-বুদ্ধি দিন যাতে তারা হযরত মসীহ মাওউদ (আ.)-কে মানতে সক্ষম হয়।


এছাড়া বিশ্বের সার্বিক পরিস্থিতির জন্যও দোয়া করুন, আল্লাহ তা'লা যেন মানুষকে বিধ্বংসী যুদ্ধ এবং এর ভয়ানক পরিণাম থেকে রক্ষা করেন। যুক্তরাজ্যেও উগ্রপন্থা দমনের নামে মুসলমানদের জীবনযাত্রা সংকীর্ণ করার চেষ্টা চলছে। যদিও একটি নির্দিষ্ট সংগঠনকে নির্মূল করতে একটি আইন প্রণয়ন করা হচ্ছে, কিন্তু আল্লাহই ভালো জানেন যে, এর নেপথ্যে তাদের মূল উদ্দেশ্য কী? তাই দোয়া করা উচিত, আল্লাহ তা'লা আমাদেরকেও আর এখানকার অন্যান্য মুসলমানদেরকেও তাদের সর্বপ্রকার দুষ্কৃতি থেকে যেন সুরক্ষিত রাখেন।

আল্‌হামদুলিল্লাহি নাহ্মাদুহু ওয়া নাসতায়ীনুহু ওয়া নাসতাগ্‌ফিরুহু ওয়া নু'মিনুবহী ওয়া নাতাওয়াক্কালু আলাইহি ওয়া না'উযুবিল্লাহি মিন শুরুরি আনফুসিনা ওয়া মিন সাযিয়াআতি আ'মালিনা-মাইয়্যাহ্‌দিহিল্লাহু ফালা মুযিল্লালাহু ওয়া মাই ইউয্লিলহু ফালা হাদিয়ালাহু-ওয়া নাশহাদু আল্লা ইলাহা ইল্লাল্লাহু ওয়াহ্দাহু লা শারীকালাহু ওয়ানাশহাদু আনা মুহাম্মাদান আবদুহু ওয়া রাসূলুহু-

'ইবাদাল্লাহি রাহিমাকুমুল্লাহু-ইন্লাল্লাহা ইয়া'মুরু বিল 'আদলি ওয়াল ইহসানি ওয়া ঈ'তাইযিল কুরবা ওয়া ইয়ানহা 'আনিল ফাহশাই ওয়াল মুনকারি ওয়াল বাগ্‌ই-ইয়াইযুকুম লা'আল্লাকুম তাযাক্করন। উযকুরুল্লাহা ইয়াযকুরকুম ওয়াদ'উহু ইয়াসতাজিবলাকুম ওয়াল্লা যিকরুল্লাহি আকবর।

(‘মজলিশ আনসারুল্লাহ ভারত’ কর্তৃক প্রকাশিত সংক্ষিপ্ত উর্দু খুতবার অনুবাদ)

বি. দ্র. - নাযারত নশর ও এশায়াত কাদিয়ান থেকে নব প্রকাশিত বাংলা পুস্তকগুলি হল : ১. ইসলামী শিক্ষার আলোকে প্রকৃত শান্তি এবং ২. মেয়াকুল মাযাহেব (ধর্মের মানদণ্ড)। পুস্তকগুলি প্রথমবার বাংলা ভাষায় অনূদিত হয়েছে। সংগ্রহের জন্য সংশ্লিষ্ট জেলা ইনচার্জদের সাথে যোগাযোগ করুন।- ধন্যবাদ

<p>Bengali Khulasa Khutba Juma Huzoor Anwar^(at) 15 March 2024 Distributed by</p>	<p>To,</p>	
<p>Ahmadiyya Muslim MissionP.O..... Distt.....Pin.....W.B</p>		
<p>বিশদে জানতে : Toll Free No.1800 103 2131 www.alislam.org www.mta.tv www.ahmadiyyamuslimjamaat.in</p>		

Summary of Friday Sermon, 15 March 2024, Bengali 4/4; Translated by Bangla Desk Qadian